

**Sultan Pahang Rasmi Akademi Maritim Sultan Ahmad Shah
Bernama
2 Mac, 2013**

KUANTAN, 2 Mac (Bernama) -- Sultan Pahang Sultan Ahmad Shah pada Sabtu berkenan merasmikan Pusat Latihan dan Akademi Maritim Malaysia, yang kini dikenali sebagai Akademi Maritim Sultan Ahmad Shah (AMSAS) di Gebeng, di sini.

AMSAS yang serba moden dan kontemporari di kawasan seluas 80 hektar yang dianugerahkan Sultan Pahang itu dilihat bakal menjadi pusat kecemerlangan latihan maritim bertaraf dunia.

Bertitah pada majlis itu, baginda berharap warga maritim menjaga kompleks berkenaan dan mengurus tadbir dengan baik agar menjadi satu pusat yang bertaraf tinggi menjelang tahun 2020.

"Anggota maritim perlu berdisiplin, taat serta berdedikasi untuk menjadi modal insan yang berprestasi tinggi dan berdaya saing," titah baginda.

Turut berangkat Sultanah Pahang Sultanah Kalsom dan Tengku Mahkota Pahang Tengku Abdullah Sultan Ahmad Shah.

Turut hadir Timbalan Perdana Menteri Tan Sri Muhyiddin Yassin, Menteri Besar Pahang Datuk Seri Adnan Yaakob dan Ketua Pengarah Agensi Penguatkuasa Maritim Malaysia (APMM) Laksamana Maritim Datuk Mohd Amdan Kurish.

Baginda bertitah anggota penguatkuasa maritim perlu meningkatkan komitmen dalam melaksanakan tanggungjawab untuk manfaat masyarakat.

Sementara itu, Mohd Amdan berkata sejak ditubuhkan pada 2005, akademi itu melatih 2,127 orang pegawai penguatkuasa termasuk 140 pegawai wanita.

"Akademi ini juga telah memperoleh sijil akreditasi latihan dari Jabatan Laut Malaysia pada Disember tahun lepas bagi melaksanakan kursus-kursus berkaitan," katanya.

Beliau berkata pada masa yang sama juga, APMM akan mempertingkatkan usaha memperkukuh keupayaannya agar kewujudan warga maritim terus relevan kepada masyarakat dalam melaksanakan tanggungjawab menjaga keselamatan perairan negara.

"Akademi ini adalah bagi melestarikan peranan APMM sebagai agensi dalam menguatkuasakan maritim Malaysia. Kewujudan akademi ini mencerminkan kebijaksanaan pemimpin negara dalam mengukuhkan latihan dan kompetensi penguatkuasa maritim dalam tugas menguatkuasakan undang-undang persekutuan di Zon Maritim Malaysia," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=931524>